



淮陰秋水先生耽書嗜古肆力於詩至被誣瀕於  
危而氣不少挫詞章日富名亦日益彰人咸心異  
之謂生逢盛世得田園樂利詠謌太平如古碩人  
寬廣且閒亦足優游卒歲超然塵埃之外且先生  
常通籍爲比部郎五月即乞歸是宜恬靜而無競  
者尚何所振觸而務以詩鳴也及歲辛巳延余課  
其孫乞其集竟讀之知先生少孤苦後復因家多  
故有不得已於中者而非以此求名於世也獨不  
聞南郭子綦之言天籟乎大塊噫氣其名爲風是



惟無作作則萬竅怒號唱于唱喁小和大和厲風  
濟則衆竅爲虛夫詩亦若是則已矣負瑰異之姿  
更歷多事復博涉書史以廓其胸中之議論醞而  
釀之不得其平于是隱隱嶽嶽若內有所結此亦  
詩人之噫氣也以一己之性情觸乎外物之感而  
復有積卷以助其氣則榮悴升沉死生聚散悲歡  
歌哭嬉笑嘲謔紛然並集而風雨晦明雷霆薄擊  
草木之華落蟲魚之變態與古今來可喜可愕事  
俱各有動於心遂緣物寄興隨事抒情若有不得

已於機緘者畢形之詩而不能自止然則先生之  
詩先生之噫氣爲之也夫人之性情不同所涉之  
境遇各異雖共生一時亦千百其途不一致而爲  
詩者顧徒求工聲偶踵襲相仍是豈足言真詩哉  
先生樂府歌行不貌古神與古會近體更排冪渾  
脫味餘於言要皆有先生之性情境遇在而非模  
山範水嘲弄花月比也屈宋之騷李杜之詩讀其  
集即想見其人彼各自有所感不相假借豈容  
萬竅必同一聲乎貴有其真者存焉爾余於先生

詩亦云集舊名雲山樓以罷官歸時曾築林下堂  
今自庚辰續刻因以名之其亦退而求息有風濟  
而虛之意歟則優柔平中造乎冲澹余不知工力  
之所至矣辛巳仲冬錫山朱宗洛拜手序



遊且園贈秋水先生兼索詩鈔

滔滔淮浦長灑灑珠湖曲願挽清淮流試濯塵土  
足逍遙任天遊何妨一枝宿雲物媚沙嶼園林列  
金谷主人瑚璉器逸氣翔鸞鵠佩紱向天曹歸隱  
企高躅憶我去年秋長安困馳逐迴棹賦南征孟  
冬泊湖澳同舟金蘭契吳君交素夙攜來秋水鈔  
云是騷壇燾不似女郎詩堪與山石續鯨魚掣碧  
海溟漲斡坤軸河源恣奔波元氣滋滲漉性情所  
噴礴詰屈相振觸蓬牕俄展卷歎息未竟讀噉蔗

得初味酌壘留餘馥今年渡江來兩月擁書簾暮  
春童冠希殘夜燈檠獨草沒釣臺蕪潮浸莎碑盛  
弔古託浩歌幽懷付遐矚欲尋林泉樂一豁江天  
目晨朝叩園扉春風扇絢緡入門瓔珞垂滿架籐  
陰綠步轉忽宏敞佳氣浮清泚鶯花浩如海煙景  
雲相屬窈窕當徐領次第不容促暫憩若舫軒恍  
入山陰麓虛庭落空翠搖蕩茗雪涿佇眺芙蓉居  
照眼妍姿簇是時穀雨節桃李多碌碌海棠惜飄  
零木蘭謝芬郁花王特豐艷作態露新沐晴曛醉

玉樓嬌酣貯金屋迤邐陟石臺高明瞰喬木何當  
盛夏時息蔭避三伏冰簟引清風彈碁對楸局小  
徇跨紅梁繫艇漾漣縠武陵在何許問津吾所欲  
迴磴巧凹凸仄徑屢不于迢遞奧且曠折旋往而  
復割開林下堂掛冠後新築週遭擁雲樹偃仰宜  
涼燠風塵甘息機知止遠殆辱超超曠士懷冉冉  
韶華速孰窮千歲憂聊爾伴林檎君看池上閣水  
月洗蔭濁空明澹色相了了脫羈梏樓迥俯淮甸  
檻外紛舸舳安得乘長風駕此船萬斛蒼茫極千

林下堂詩  
里法界渺一粟繞牕白英披縈綴球圓蹴爲挹冰  
雪姿遙映姚黃族慎勿判低昂萬象共一轂悠揚  
柳絮飛游絲裊晴旭深沉院落靜林鳥時鳴鷓茲  
遊破旅愁何須飲醺醪前身王子猷到處喜看竹  
歸枕夢亦清正恐未數數結念園中人孤標絕塵  
俗胸襟自邱壑得此洞天福閉關娛清晏養痾謝  
劬戩衡門足棲遲萬卷可充腹松徑日成趣天機  
自杼袖何恠筆如椽雅製成一束向偶窺豹斑更  
思探珠櫝胡爲獨寤歌寧尚畏謠詠僕本樗散材

東髮耽書牘蓉溪采杜若蓮峰伴麋鹿碧山託吟  
社縞紵儼清肅跌宕藝苑間差喜辨麥苽每於羣  
豪中無能嘲粥粥年來歷京邑我馬何蜷跼天地  
盡蘧廬被褐愛初服卷舒觀自在坦懷畧邊幅無  
因慎勿投蘊真忌媒鬻浩蕩狎鷗鳧雜沓羞雞鶩  
幸茲邁竒傑詞氣吐飛瀑闊達富蘭交宕佚惡瑟  
縮竭來涉山樊敢惜毛穎禿長謠雜巴吟蘇壤引  
瓊玉錫山朱宗洛拜草



林下堂詩卷

雲山老人

程鑿

秋水氏著

時年七十又二

庚辰一

吾居

背郭臨湖遠市譁杜門何以答春華松篁泉石棋  
邊鶴詩畫琴書月下花難道此身無着處自然送  
老有生涯舊傳枚里當時巷咫尺比鄰是我家

予宅

家巷即枚  
臯舊里

觸緒

觸緒生煩似水縈有情那得博無情愁隨亂草延  
新綠病逐梅花是舊盟白剩未除頭上髮青留湏  
別眼中晴比來人事如何了閉戶不聞門外聲

雪夜

爛漫梅花雪沉沉清夜鐘我室已生白我爐猶未  
紅孤情不厭寂亂髮且葦鬆敝貂渾禿盡還戀此  
身中

雲山樓雪月歌

無月雪不明無雪月不白月勿去雪常留安得夜

夜提壺一醉雲山之高樓

春寒

雞聲喔喔鼠啾啾二月春寒到楚州孤枕無情人  
擁褐一燈風雨夜如秋

遣興二首

草木有根人有命升沉何用卜君平匱中美玉原  
無價項下驪珠本自明兒女易傾泉客淚丈夫恥  
作杜鵑聲素沙白石終吾志碧水溪頭見底清  
無怨無尤未是愚毋煩三擲博三盧花飛蝶散香



應歌釜破魚亡水自枯袖裏行藏憑毀譽杯中真  
偽且模糊卻憐多病休官早空羨麒麟有畫圖

淡薄

人思爭長爲雞口吾畏穿墉避鼠牙紫玉尚餘桃  
竹杖綠芽誰致雪坑茶生魚釜是萊蕪令羅雀門  
非廷尉家淡薄不嫌終日靜繡囊還憶夢中花

竹底

三徑蒿蓬無過客百年麤糲有盤餐區區事業歸  
華髮草草生涯付釣竿但得清閒酬一日不勞辛

苦逐雙丸高天厚地容疎放竹底橫琴且罷彈

對奕

花雨簾前客屐留琤琤寒玉一枰秋何因墮入輪  
迴劫今世今生打未休

孤兒吟

孤兒有母無父腹苦饑衣露兩肘顧視魚飼猫肉  
窳狗兒弗之若人知否兒頑癡笞之扑滿三百仍  
更笞夏楚爲災誠難持弟乞代大嫂爲剖嚴風殺  
木簷冰七尺霜寸厚赤身反復露前後兒實罪過

兒應受兒不足惜竊恐傷母手淚不敢下頭不敢  
叩一言欲言言猶在口倘念骨肉恩願留全體歸  
父母

破盆歌二章

狗喪家鬼破盆

易林貧鬼守門日破我盆

大男守舍中男守門出

入無禁堂上何人

伯仲叔季一二三四

皇極經世八卦之數一二三四為陽五六七八為陰

一車載來

一車去大廈已傾盆何足計

飯罷

青精飯罷頻窺鏡  
瑤草相期拾未能  
老去始知春可惜  
覺來方曉夢無憑  
東升西沒成今昔  
暮悴朝榮易廢興  
回首風塵休逐逐  
莫教驅拍等蚊蠅

世眼

世眼隨高下  
凡情太認真  
語君休着意  
曾有過來人

過趙一孃舊宅

無賴鶯花惱殺春  
風臺月榭久成塵  
傷心還有垂楊線  
我是當年繫馬人

題汪梅坪水香園圖二章

麾肉處士洗藥真仙歙縣誌阮公泉在潛口汪沅詩仙人洗藥處惟見碧流泉其時邈

矣其迹弗蠲村因名得歙誌陶潛舊里因名潛口溪以氏傳阮公泉一名阮溪

結屋於茲別有地天一檻之外萬壑當前

芙蓉獨秀六六相連白雲不亂紅萼無邊香流水

面泉嵌山巔山頂有日月兩泉或觴或咏幽人止焉圖以誌

之子孝孫賢

春遊

新楊瀟灑水西東淺淺雲光款款風細草留連隨

地綠閒花惆悵近人紅欲憑漁父將予意試問仙  
源何路通忽忽不知雞叫午半空日影正天中

孤吟

一片薜蘿爭繞舍幾年賓客未登堂履聲寂寞春  
無跡劒氣崢嶸夜有光歷世肯隨人上下不才何  
用老佯狂繡袍金椀思高齋此日孤吟畏舉觴

小院

小院風光儘可賒午眠人起帽長斜開簾一鳥高  
飛去擲地無聲有落花

雨夜感興

他意他心未可量  
潛身人似蚌中藏  
拙憐鳩婦非鸚鵡  
偽擬雞雛是鳳皇  
竟夕廢書成浩歎  
一櫺風雨重淒涼  
白頭猶自謀衣食  
爲父爲兒孤少心暗傷  
濯足

嗜懶

放顛嗜懶遠輕肥  
姓字無聞識者稀  
處士免投東

海死丈人已息漢  
陰機寧甘皂帽辭  
文冕不願青袍易  
布衣散髮行歌終  
我事持竿而去得  
魚歸

遣意

堅金無異色  
世事迴相違  
見利心能易  
知恩古亦稀  
孤懷抱隱痛  
結念面斜暉  
默默春無際  
輕風飄我衣

林下

願謝歡娛地  
慙非醉飽身  
羣居他自好  
獨處我無鄰  
三寸空餘舌  
一文

水經注漢劉寵作郡有政績將解任去治父老人持百錢出送寵各受一文

累人高歌托林下爛漫古梅春

雨梅

細雨濕梅花枝枝映水斜  
草堂稀客到錦障教誰  
遮臭去香微歛看來色未差  
此番珍重意不異在  
林家

山樓

梯級度層層扶行仗老藤  
草芽春漏洩梅蕊雪侵  
陵石檻誰同倚山樓我獨登  
片時風動竹鐵馬走  
簷棱

乍暖

冉冉蜂初至啾啾鳥弄音  
梅知開笑口柳解吐春  
心好日隨時過新詩幾度吟  
平生恣幽閒獨立俯  
庭陰

春郊策蹇值雨

襄陽孟子減風流泥汗雙靴  
雨漬裘恨殺疲驢難  
振作一鞭一步一搖頭

終日

風光終日好錦繡足三春  
欲放看花眼難爲面壁

人軒庭無襍韻蜂蝶有天真朝夕卷簾意皤然老  
此身

春泛

泛舟無遠水一匝繞城隈柳岸聞歌鳥春衫點落  
梅不因乘興出難遣好懷開向夕形生影東偏月  
照來

山陽遣興

竹枝搖曳老龍鍾獨往獨來任所從掩鶴井邊仙  
未遇

山陽誌林素居道貫蓄一鶴有異人至則飛鳴一  
日呂仙來先掩鶴於井中使不得飛鳴今井尚存

釣魚臺畔母

難逢桃花入眼胭脂淺春酒傳香琥珀濃買笑且  
酬今日醉綠楊處處繫遊踪

近水有園

近水有園望裏賒重重樓閣野雲遮白飛柳絮章  
臺雪紅散桃花洞口霞綺陌肯停公子騎香塵輕  
碾美人車苦遭蜂蝶爭華麗卻怪一鷗立浦沙

海棠歌

千花萬花花藏葉爛漫爭開開不歇猩紅血濺蕊  
離離臙脂濃滴嬌抽絲火珠密結瓊瓏網朝霞深

護紫羅衣吳宮似憶秋江水漢殿猶憐去國時恃  
有一番真色相何勞作意弄嬌癡柳搖曳草溫柔  
春光正好雙鳴鳩立而望之心引憂憑闌兮繾綣  
美人兮難留恐旦莫兮風雨感飄零之無由

海棠爲風雨所摧

無端掩卻西窗月雨雨風風卒然發繁葩亂蕊變  
須臾墮紫垂紅經汨沒片時飄泊苦西東烟沉水  
逝馨香歇老夫曉起盼庭柯惱殺蠶兒愁殺蝶望  
裏蕭疎可歎人昨日看花今看葉

楊貞女

寡鳳不雙飛睢鳩豈再偶貞女方娉婷夫厄遭陽  
九雖結百年歡未及事箕帚生時不相識知誰夫  
若婦淚盡繼以血泉下人知否託孤古所重無孤  
何所守從死世所輕不死意何取堂上有姑嫜膝  
下無黃口送養兩難辭紅顏期白首其中歷苦辛  
何一非身受男子且弗如女能出其右貞堅亦松  
栢飄蕩非楊柳與日月齊光共金石不朽

藤花閣下

花飛一徑紫水落半池明柳色侵人思鶯聲繫客  
情拓窗吟未厭拂石坐來平不信赤闌外一枝春  
筍生

新葉

舊樹萌新葉新枝雨後看娟娟浮軟碧悄悄弄春  
寒綠淺茶初啜黃輕汗欲乾一從搖落後還倚赤  
闌干

青竹杖

九節仙人杖青青手重持回頭時礙帽仰面不妨

看未得爲龍去先曾作馬騎清宵倚明月花下步  
頻移

過水亭

郭外鶯聲巧弄脣赤闌橋畔水亭新幾絲楊柳牽  
行客一架藤花立美人況有雲霞收暮雨不勞笙  
管度餘春汝曹第覺歡娛甚醉飽何曾負爾身

楊花

歷亂柳飛絮飄零近舞筵隨風且作雪帶雨不成  
綿裊裊牽絲網輕輕點硯田吹噓空着力難得上



青天

隱几

隱几燈搖燄開軒月到遲垂頭犬不吠突目鼠猶  
窺白玉投泥日金花忍辱時乾坤原浩蕩巧拙任  
人爲

遣興

落日西垂水向東憐才好色兩成空紛紛柳絮牽  
愁白片片飛花帶笑紅人似有情回半面容慙無  
計逐春風扁舟漫擬同歸去獨釣烟波萬頃中

食鮓魚三首

頰尾四鰓不足貴時鮮異味豈常才翻憐白日炎  
天句放箸停餐定幾回

燕雲江水路三千露底風前抱月眠見說年年馳  
入貢秣陵遺事少人傳

當年專廠拜中官冰窖開封敢暫寬雲物不殊今  
昔異玉鱗依舊湧晴瀾

墻東

漫分猿鶴與沙蟲總在洪爐化育中歌詠已成千

林下堂詩 卷一 十一  
古癖行藏不必萬人同悲絲急管誰家子冷炙殘  
杯何處翁紈袴紛紛能事畢僧牛有客在墻東

晚景

行盡清溪路欲窮野烟漠漠草溟濛歸雲只在山  
中白落日猶餘水際紅轉以地偏先得月不知林  
僻反多風沙頭沙尾人無跡一笠蝦鬚望眼空

喜得

朱櫻綠笋動經年紫楝花飛四月天陋巷已安顏  
氏宅銅山豈羨鄧家錢若孫若子皆非也爲馬爲

牛盡枉然喜得一身能料理朝餐午醉夜甘眠

自嘲

顏子一瓢飲遂成千古名爲儒不飽死從俗豈偷  
生有榻留雲臥無田帶月耕吾廬尚安穩燕雀且  
休驚

夜半聞箏

甲冷雞聲促秦音入五絃昏燈挑夜永破月照人  
偏不覺益愁思因之慨莫年當杯難強進斯意轉  
茫然

雙扉二首

慣習掩雙扉長年客到稀  
春秋啼鳥亂風雨落花  
飛嗜學老忘倦幽棲志不違  
假如能辟穀焉用此  
身肥

緼袍仍稱體十度不裁衣  
古貌非時取孤懷與世  
違汝曹能事足吾輩故人稀  
向昔仰冥莫高高看  
鳥飛

江樓

倦倚危樓眩欲扶風濤雪浪走明珠  
千尋落日邀

帆影萬古雲山湧畫圖  
放眼不知烟水寂  
低頭頓使旅情孤  
潮聲直向海門去  
朝夕催人自可吁

彼哉歌二首

彼哉復彼哉有若粃與糠  
腐螢思敵日醯雞哂鳳  
皇天卑而地狹誰當論短長  
腹蟲蠹林木野狐踞屋梁  
外類匪難斥內患烏能  
防榮悴無定理不言心已傷

嗜嬾

嗜嬾貪眠性復迂  
書籤藥裹兩相須  
小言直欲窮

蠅鬢挿齒馬能拔虎鬚悶遣花奴雙擊鼓醉思玉女賭投壺飛揚逸興那判得白髮黃精掃卻無

午日雨中泛湖

漁父歌聲杳蕭然我獨遊烟沉南北岸

荆州圖經南北岸屈原之鄉里

雨失荻蘆洲小泛舟浮葉微涼夏似秋因誰論往事千古意悠悠

答人

案頭古硯不留塵日日酣吟寄我真快讀毛詩三百首厭聞椿壽八千春

或逢人或書至咸以多壽為誦心實厭之

一雙白眼堪

酬世十載青燈早誤人若問此身歸定處衡茅亦自有蒲茵

對雨

天暗晝長昏拋書對蘚垣濕雲沉海國苦雨漲柴門斷續無停響高低有漏痕悶來只益睡萬事可忘言

題美人圖

桃花如面雪如膚絕代美人在畫圖為雨為雲飛不去非生非滅兩模糊

雨

久晴曾禱雨久雨復祈晴旱潦雖難免盈虛理易明人心能感格天意本均平為語饑驅客休聽打葉聲

輕生二首

一夕輕生命數奇既逃復返意何為死蜂在手逢萌去不用人言事可知  
連根并蒂散如星一夜風吹九子萍若使世間無屈抑不應天上有神靈

小亭

霑濡坐小亭雨色苦冥冥竹送千尋碧池羸三尺青蝦蟇實可厭鵝鴨亦堪聽屋外家家水愁心敢自寧

狂歌

三餐還未缺斗酒許相親不敢忘天地何嘗事鬼神狂歌酬 聖代老病授閒身回首青門客當年富貴人

家園

湖海悠悠那傍人松扃竹院好安身輕雲不礙花  
間路小艇時驚水上鱗腹果三餐恒自勉衣非百  
結豈爲貧乾坤蕩蕩吾何有每一長歌欲損神

傷梅

老梅傾扑若折鐵千空萬隙螻蟻穴皮苦顏色壞  
根斷生意滅不信開窗失綠陰頓令書屋影半缺  
見者合愴神回首春光成電瞥客有思那自持顛  
風疾雨毋相摧可憐欲落未落葉似若不忍離故  
枝吁似若不忍離故枝木猶如此人奚爲

湖上晚晴

旬雨失苔磯疎林過夕暉孤雲隨意往衆鳥逐羣  
飛水遠天光接漁歸烟火稀臨流畏蕭索暮色欲  
侵衣

且園

蜀葵紅及丈荷葉碧成盤淺淺池堪濯森森竹可  
觀蟬聲驚翡翠柳色落闌干得倦且休息吾知天  
地寬

晴窗

杳杳陰雲散悠悠紅日升曝書奔老蠹拂硯走蒼  
蠅淡薄無恒僕蕭條乏遠朋相看能不厭白髮鏡  
中仍

野步

遠色來村塢村烟漠漠生曳鞋隨牧笛隔岸聽鐘  
鳴有鳥林難靜無魚水自清對茲懷往事那得更  
忘情

愚愚歌

搥鐘兮掩耳戴石兮履冰坐智井兮天光小入閻

室兮日常盲畏明月兮踏查走捧滄海兮澆螢昏  
昏兮昧昧將鳳爲雞兮牛爲麟

解恨

衰年幸免道途塵奚意安閒易苦辛賈誼已甘爲  
異物仲連豈合作難人此生漫卜他生事欲了還  
餘未了因每自恨時仍自解焦琴破硯且相親

飲荷池醉臥柳下

坐飲蟬聲歇臨池水一篙石闌紅菡萏玉盃碧葡  
萄酒醒人何在夢多魂亦勞時光吾浪擲抱筆愧

曹褒

貧士

志不在輕肥能無寒與饑一瓢顏子飲百結董威  
衣壺竈居然缺親朋識者稀問君胡乃爾安遇恥  
爲非

病遣二首

華髮蕭蕭一腐儒偶然依檻引長吁稽山賀監原  
狂客蜀郡相如本大夫知命不違男子樂高居休  
笑北公愚夢遊曾許還鄉里敢乞周官數頃湖

鳴雨過庭氣欲蘇冰茶一碗飯雕胡何由負局來  
磨鏡卻歎嵇康誤鍛鑪潦倒祇憑詩送老扶持藉  
以杖爲奴原知鬧市難埋影錯怪旁人尚識吾

北齋

展簟移牀臥北齋涼風吹響入庭槐掃除白髮吾  
何有揮盡黃金貧亦佳歲月駸駸留不得生涯草  
草未全乖開門便是蕭湖上七尺蠻藤兩竹鞋

睡起

缺月不成圓空牀欠穩眠是人皆入夢與鬼復何



綠淚落青衫覺燈明白髮縣有形斯有影苦被肉身牽

且園久雨

尚喜茲園得我娛于焉托跡遠招呼單居自是非  
秦贅抱璞毋煩說宋愚犬馬無恩空悵惘草茅有  
徑敢荒蕪但憐久雨經頽塌古壁危廊着意扶

見鹽井鴿感賦

煢煢逐逐道途間賣卜人今異昔顏似若鼓鰓魚  
蠢蠢儼然在囿獸般般無端怨女冤銜石不信癡

蚊敢負山海上生涯鹽井鴿

海鴿食鹹滷多止鹽井間羽毛頗鮮潔

羽毛雖

具費躋攀

笛夜有懷

一聲笛弄江南曲竹影在牀松在屋半夜月明人  
卷簾孤螢點破芭蕉綠

西湖

西湖歷歷紀分明廿四年前着屐行

時丙辰五月

風雨樓

臺都入夢山川花鳥尚關情乾坤已辦愁中老歌  
管全銷醉裏聲一自草茅歸臥後同遊今得幾人

生

夏夜

破雲不掩月照席光璣瓏老蝠恣饕餮饑蚊轟西  
東赤腳畏蜈蚣仰面觸遊蟲夜景頗不潔齷齪身  
難容我欲叩清虛飛入瓊瑤宮

憶昔

憶昔少年甘鴛緩不因今日始蹉跎香鬢粉面饒  
蝴蝶屈足昂頭遜駱駝但念一身供痛癢幾時五  
蘊得消磨世間極樂終非樂空去空來水上波

驟雨

轟然飛霹靂瞥電過梧桐雨腳來河北雲頭自海  
東青苔不爛死秋豆轉成空且喜暑能薄炎涼頃  
刻中

偶來

無人知我閒落日叩筠關圓水抱孤寺亂雲投故  
山偶來亦暫好逸興未全刪向晚涼生鬢溶溶踏  
月還

林下堂詩卷一 畢

林下堂詩卷

雲山老人 程塾 秋水氏著

庚辰 二

遣意

開簾迎草色倚杖對花飛五載謀衣食一身憑瘦  
肥何山堪采木無路叩玄機但自完名節不言人  
是非

不知

不知有貴賤豈復問窮通事業花前夢年光草上

風形勞心愈拙影滅世皆空稍得盈虛理千秋彈  
指中

喜晴

青天碧海海天秋淨洗明河塵不留月滿渾如新  
鏡面雲開忽失舊峯頭絺衣濺露身忘倦羽扇生  
風夜亦幽况有微螢依斷砌雨苔烟草一齊收

八哥

八哥八哥君家兄弟多兄弟多兮猫當奈何

清夜

一絲如繫尚支持古徑松陰步且遲歷遍羊腸終  
自惜得離虎口又經時若非身受焉知苦可向人  
言未是奇即使問天天莫聽清宵立盡露垂垂

秋至

涼風悽我懷簟席生疎索張翰思羹鱸宋玉悲搖  
落豈不感時序憂來罷歡樂哀鴻失其羣墜葉終  
無托閒花繞舍秋秋光焉可握顧視鏡中顏今日  
已非昨

同過草堂

林下堂詩 卷二  
淺水斜穿小市橋晚涼攜手步逍遙草堂有約須  
乘興山月自來不用招一盞松醪當露飲遍身花  
影任風搖往時邂逅輕離別今日相逢鬢已凋

自愛

不邀榮利敢辭貧自愛清虛養谷神悶逐小池窺  
樹影嬾從鬧市走車輪久判白髮歸明鏡何用黃  
金作販人石髓雲英如可致乾坤留得此閒身

秋柳

雨露恩沾爾最先千門九陌說當年于今落葉無

黃鳥終古殘陽有暮蟬片片夕鴉垂釣處盈盈一  
水斷橋邊比來擊目情難遣回首春風已惘然

雨夜夢故人

葉葉芭蕉雨聲聲破壁蟲秋燈人影瘦孤枕夢魂  
通事業一杯土功名兩耳風低頭思往昔啼笑與  
誰同

秋興

舊國思歸日他鄉落照間晶晶慙雪鬢薄薄仰雲  
山暑退蟬先靜秋來樹不閒浮生感飄泊宿昔巧

催顏

蟋蟀夜

依簷附草竟何求  
蟋蟀自鳴聽者愁  
客子不眠孤月迴  
天公無語片雲秋  
已悲浮世同鷗鷺  
忍向旁人應馬牛  
卻笑一生成棄擲  
有山水處便勾留

塞外

隴水秦山歲月頻  
十年征戰不知春  
將軍令出思酬國  
探子馬來敢惜身  
白首未歸邊外使  
黃泉猶是夢中人  
鐵衣夜抱刀環泣  
野火無光走碧燐

盼人

日日東南望柴門  
又落暉已驚黃葉亂  
復見塞鴻飛冉冉  
秋將半迢迢人未歸  
短書猶在握展轉意  
多違

夜渡

暮抵黃河側黃河兩岸沙水渾  
不受月柳弱未藏鴉破艇無漁火  
孤村乏酒家荒涼動心魄迥立向  
天涯

今生

林下堂詩 卷二 四  
今生吾忍見未必盡前因仙佛忘恩怨龍蛇任屈  
伸當門惟一犬入室竟無人不謂青藤杖翻如骨  
月親

不才歌

疎懶性成癖況兼狂與癡可望弗可即與世殊乖  
離不才斯已矣未合供人嗤天地吾知大蠓蝨吾  
知卑奚物口蚩蚩唇勞舌亦疲方之蒼蠅聲隨風  
颺塵灰吾方高視雲霄不與爾輩同遊嬉噫大言  
無禁何爲乎

齋中

春秋閒送老歲月苦相仍筆禿山中兔床穿坐處  
繩跛貓窺穴鼠小犬逐蒼蠅對此消清晝孤懷永  
抱冰

徒壁

徒壁尚留司馬劒空囊還剩少陵錢阮家南北分  
貧富越女東西別醜妍各有前因非所計別無他  
願且甘眠神丹半劑終吾事不作天仙作地仙

山樓

山樓寂似夜客思淡於禪萬事吾何有新詩誰見  
憐白雲依案腳黃葉到牀前薪米須籌畫僧厨尚  
悄然

中秋月

照席光初滿當軒眼欲新山川入明鏡天地絕纖  
塵白髮酬佳節清宵獨此身莫嫌夜孤寂月裏豈  
無人

垂簾

簾垂到地露華滋梧竹過墻影漸移萬古傷心明

月夜百年多病仲秋時醉思斷地王郎劍語愛驚  
人杜老詩的有牢愁消未得哀蛩唧唧斷鴻悲

病起

扶童倚杖軟於絲幾日西風病起遲畏苦暫須停  
藥汁忍饑且緩進羹糜情憐秋燕凋零候心似寒  
蛩冷落時乍喜開簾活雙目木樨花發蓼花垂

煎茶

騰波沸有聲活火煎無色一葉芭蕉風茶烟苦不  
直



野興

斜日臨川處處幽  
林塘紆僻得勾留  
落霞一片芙蓉醉  
野水無聲天地秋  
漁艇漸歸黃葉渡  
酒旗還立古橋頭  
風楊繫馬誰家子  
有女佯羞不轉眸

晝睡

一夜半夜醒一日半日睡  
疎櫺進日光遍身花影碎

桂堂

叢桂發花放古香  
秋堂閒寂戀餘芳  
原生肘見貧

非病杜子詩成老更狂  
三徑草深迷出入百年地  
僻嬾衣裳寒蜂冷蝶知多少  
一枕南華不下牀

夜齋

頽形付燈影幽意托焦桐  
露重清宵永風涼小院空  
竹陰浮硯上月影入杯中  
對酒不求醉樽前一老翁

晨興

晨興降白露八月早披裘  
雁且隨時至燕應難久留  
雲歸寒送雨風過葉吟秋  
此際天涯客鄉心可

自由

黃葉辭

黃葉落兮白雲飛雁南翔兮菊菲菲風飄衣兮入  
我室月照簷兮低垂幃感余心之未寧兮腸百轉  
以如馳忽先歌而後泣兮似假樂而真悲人生兮  
多艱往昔兮難追莫不撫膺長歎痛雨散而星離

寒雨吟

寒雨夜颼颼一點一聲秋秋能使人悲雨復令人  
愁愁不絕悲難輟吾生安得如盲聾擲瓢卻憶箕

山公

古松

黛色團青蓋霜皴溜雨痕孤根穿石骨老幹立高  
原急響驚濤沸蒼寒白晝昏千尋勞仰視雲氣接  
天門

九月一日生日

年光百歲差三十秋色三分剩一分縱使芳蘭萎  
蔓草寧甘野鶴在雞羣鐘鳴鼎食終難易竹韻松  
篁實飽聞我有草堂容寄跡移山曾讀稚圭文

學仙

除此別無生活計黃冠合作道人看神仙原是英雄事天地恢恢四海寬

九日家居

秋風吹短鬢落葉感年華念此重陽日蕭然處士家戀頭猶皂帽繞砌尚黃花獨酌傾餘瀝香醪不用賒

秋庭

秋草有餘綠霜花多醜顏庭荒吾自整院靜鳥常

閒寄跡風塵外逢人可否間白雲恣來往端不負青山

堤上

落葉古城秋歸雲擁戍樓雁隨帆影沒水帶夕陽流徒有臨風歎終難散客愁釣魚人不見碑下弔韓侯

別院鶴聲

鶴唳本清越爾鳴胡啾啾臥月聞聲切隨風過枕頭匪獨妨予寐抑且引我愁喧嘈勝鶩鴨比鄰聚

伊嘍迺知焚琴者應非高士儔稻梁且慳澀魚鱠  
尚何求甘山羞仰鳳海上愧羣鷗若不開籠去屈  
抑幾時休

閨思

罷繡停機幾睡醒孤燈一點碧於螢相思直渡湘  
江水山外青山入夢青

夜遣

一塵終不染奚事苦相干頭有蝨難鬚心無肉可  
剗昏燈愁裏碧秋雨夢中寒毋寐坐天曉金壺漏

未乾

輕舟

輕舟迴曲渚低柳拂衣裳一槩分紅葉雙橋臥夕  
陽蓼花連蛺蝶秋水并鴛鴦誰氏臨湖宅籬頭野  
菊香

送老友還蜀

芙蓉溪水海棠樓萬里歸心萬里秋縱與先生非  
永別登途那忍不回頭

舍舟

漁竿收拾踏秋痕一片寒陽溪上村草木就衰難  
努力芙蓉將老失溫存欲尋謝眺青山宅何處陶  
潛碧柳門滿目荒阡人影瘦水田漠漠遠雞豚

有歎

日烏東上兔西奔朝夕推移勝轉轅霜草尚憐心  
未死雨花何幸色猶存漆園蜨破周生夢蜀國鴟  
啼望帝冤反鎖衡門終我老行飛跪乳久亡恩

病中

一枕驚秋晚頽容病未瘥避風愁化蝶多睡恐爲

鼉竟日忘梳洗無時掩薜蘿知予性疎僻親友少  
人過

不同

以阿爲餌諂爲容人與人同我不同昨日一舟入  
烟水臥聽寒雨吼孤篷

晚菊

霜風摧草木零落古籬荒孤芳難獨秀安得久馨  
香逸色雖勉力嫩蕊費商量夕餐憐楚客盈把憶  
柴桑高人不重見千載永相望

遣興

非無袞冕志終寶布衣心  
錐脫囊中穎冠抽頭上  
簪亦知臣分淺難荅  
主恩深一自歸蓬華終年  
事苦吟

禿筆

中山毛穎臥珊瑚禿盡豪鋒  
歲月枯削稿不嫌君  
潦草擘箋難免墨模糊塚封  
馬鬣標髡友書愛蘭  
亭憶鼠鬚見說彩毫原五色  
生花曾向夢中無

十月二日送吳進士歸毘陵

宴罷櫻桃尚黑頭

類纂唐進士宴名  
有九五曰櫻桃宴

功名已羨及時收

蘇舜欽詩自古忠孝不  
兩立功名及時乃可收

京華三載欣重見  
淮浦一帆難暫

留書畫舫中歸有伴芙蓉江畔去無秋  
但愁客路風霜近莫厭頻頻擁故裘

雨夜感興

慙非鶻冠子敢羨奪牛翁  
雙眼應全白昏燈只半  
紅一身殘夢外萬事雨聲中  
破悶倒芳醕罇從前  
夜空

東閣早起

曉閣披衣早閒廊倚檻頻水枯池影寂霜落草痕  
新黃葉同遷客白雲如故人晨風休着意暖日欲  
偷春

采藥

采采黃精草行行亂石間不見金華客悵望馬鞍  
山

夜泊

江妃夜出遊翠袖臨風迴客夢正回頭江聲呼我  
醒

之子

之子來何方相留過小堂照人霜月白對酒蠟燈  
黃老畏歡情短愁隨鬢影長今宵同不寐明日又  
他鄉

冬夜

疾風吼蒼兕危坐不嫌恭幾點打窗雨一聲過耳  
鐘舉杯無賀監知己乏劉龔夜夜燈光下孤吟二  
十冬

題畫美人

其實美無敵令人思不窮翻疑來漢苑未必自吳  
宮欲語還遮扇含嬌似怯風若逢潘與衛添入畫  
圖中

古墓

不知何代公卿墓富貴一朝徒爾爲石馬雖存臥  
荒草可憐無樹又無碑

漁父詞

何處踪尋洞口春漁舟逐水往來頻淵明似覺無  
分曉浪記桃源悞後人

種樹

七十老翁忘艱辛種松種栢苦認真但愁落日西  
飛去不待成陰歸別人

對月飲酒

碧海青天夜未闌清光灑灑酒生瀾杯中窺取嫦  
娥影不用飛身入廣寒

有盼

極望無人喚奈何寒沙漠漠野烟多黃流只隔斜  
陽外幾日西風未渡河



繞廊

百遍循簷繞竹廊竹風吹過蠟梅香小闌拂處因誰倚一片鴉聲度夕陽

黃梅花下憶丁長年

匆匆歲月拋人去又見庭前放蠟梅非雨即風兼有雪可憐狼籍為誰開

青蟲

碧樹據青蟲與樹同一色其樹日以枯蟲乃生羽翼

讀李杜詩

青蓮居士浣花翁一盞飄零百結窮

杜詩饑臥動即向一  
旬敝衣何啻聯百結

醉裏愁中沒分曉清平調與麗人同

過所賣宅

幾株梅樹隨房去來歲春風那得攀門內主人門外客世間何事不循環

寒山二首

寒山少光輝薄暮牛羊盡夕陽度水來滿地行人影

行行踏白雲天外歸鴻泣落葉出空山樵人依樹立

冬園

冬園色憔悴僻徑凍堅牢水死池生骨草枯地不毛竹烟棲夜色松翠落寒濤未覺多時立西風凋布袍

寒梅

寒梅春動報疎花端爲吟詩送日斜老筆縱橫無醜句衡門瀟灑有生涯瓦爐續火頻添炭竹屋垂

簾能幾家忽憶故人久離別隴頭消息暮雲遮

閨中月

十二闌干一鏡懸望中箕斗各分天江南江北同相照明月曾無兩樣圓

古意

裏美人臨鏡臺晨妝猶未已郎從背後來人在鏡兒裏

剪燭歎

朱光赤燄向人熱不信自焚還自滅金剪合來心

已灰一枝淚迸珊瑚血

樓上

霜鴻南度水東流  
竟日長帆過樹頭  
鐘鼓有聲墻外寺  
琴書無恙竹間樓  
側身天地此休息  
瞥眼雲霞許暫留  
坐臥不離塵榻上  
世緣消盡復何求

凍雲

癡頑成性凍雲堅  
白晝昏昏望眼連  
便爾長風吹散了  
不知何處是青天

吳宮二首

越女嬌妍寵絕倫  
後庭歌舞夜留春  
三千粉黛花爭笑  
輸卻吳宮第一人  
終須亡國與亡身  
馬革鴟夷歎老臣  
竟欲舉兵伐齊國  
果然賣與臥薪人

塞上思

戍樓烽火望嵯峨  
夕息何曾免負戈  
馬上功名希努力  
刀頭富貴尚蹉跎  
三年笛裏鄉心斷  
一雁聲中白髮多  
倦枕忽驚惡風雨  
莫教歸夢渡黃河

寒蝶吟

嚴霜苦零肅萬物寂如無天地收羅網四海少蜘蛛有蝶出凍草專待春風吹偷眼盼蒼垠罍罍無一絲奮欲施兩翼直與青冥期青冥非蜀道去去毋猜疑縱乏封侯骨豈無文繡衣明知飛不遠端勝不飛時

寒江

蒲帆幾疊西風裏兩岸蘆花凍不死無數青峯湧雪來一行白鷺下江水

冰池月

玉杵搗不開鑿凍月沉底上下一般圓高低無彼此

南堂

鳳皇不露身焦螟矜巢穴愛日就南堂沐罷纖纖髮嗜懶勝飲漿避囂若畏蝎親朋日以踈吾涯日以拙綺季不可追微衷久磨滅慙予非朽釘伊誰識寶骨嗟哉復嗟哉頽兮歲習習

閨思

破鏡誰分半一半嵌青天比明如有日何患不成

圓

林下堂詩卷二 畢

